

Mwokozi Aliyesulubiwa na Kufufuka

Bwana MUNGU asema hivi; Mimi nami nitakitwaa kilele kirefu cha mwerezi, na kukipandikiza mahali; na katika vitawi vyake vilivyo juu nitatwaa kitawi kimoja kilicho chororo, nami nitakipanda juu ya mlima mrefu ulioinuka sana; ... nitakipanda; nacho kitatoa matani, na kuzaa matunda, nao utakuwa mwerezi mzuri—
Ezekieli 17:22, 23.

Ilikuwa ni kwa kusudi la ulimwengu wa mbinguni kuweza kuona masharti ya agano la ukombozi kwamba Yesu alichukua adhabu kwa niaba ya jamii iliyoanguka. Kiti cha enzi cha Haki lazima kiwekwe salama milele na milele.... Kwa kafara ambayo Kristo alikuwa anakaribia kuitoa, mashaka yote yatakuwa yameondolewa milele na jamii ya wanadamu ingeokolewa kama wangerudi katika utii wao. Ni Yesu pekee ambaye angerejesha heshima kwa serikali ya Mungu. Msalaba wa Yesu pale Kalvari ungeangaliwa na ulimwengu usioanguka, na ulimwengu wa mbinguni na mawakala wa Shetani, na jamii iliyoanguka na kila mdomo ungezuiliwa. Katika kutekeleza kafara Yake isiyo na kifani Yesu angeiinua na kuitukuza sheria. Angeifanya tabia tukufu ya serikali ya Mungu ijulikane, ambayo isingeweza kubadilishwa kwa namna yoyote ile ili kumfikia mwanadamu katika hali yake ya dhambi.

Ni nani awezaye kuelezea mandhari ya mwisho ya maisha ya Yesu duniani, majaribu Yake katika ukumbi wa hukumu na kusulubishwa Kwake? Ni nani aliyeshuhudia mandhari haya? Ni ulimwengu wa mbinguni, Mungu Baba, Shetani na malaika zake. Matukio ya ajabu yalitokea katika kusaliwa kwa Kristo. Katika jaribio la kudhihakiwa Kwake, washitaki Wake hawakupata kitu chochote ambacho kingemthibitisha kuwa mkosaji. Pilato alitangaza mara tatu, “mimi sioni hatia yoyote Kwake.” Hata hivyo aliamuru Yesu apigwe mijeledi na kisha akamtoa ili apatwe na kifo cha kikatili sana kuweza kufikiriwa....

Mandhari ya kutisha ya kusulubishwa yalifunua kile ambacho wanadamu wanaweza kufanya wanapokuwa chini ya utawala wa Shetani. Yalifunua vile matokeo yanavyoweza kuwa ikiwa Shetani angetawala ulimwengu. Wale walioshuhudia ghasia hizi kamwe hawakusahau picha iliyowekwa akilini mwao. Wengi waliongoka na waliwaambia wengine juu ya mandhari ya kutisha waliyoiona. Wengi ambao walisikia taarifa za kifo cha Yesu waliongoka na walianza kuyachunguza Maandiko. Hivyo ndivyo yalivyotimizwa maneno “Ndivyo atakavyowasitusha mataifa mengi.”

“Bwana MUNGU asema hivi; Mimi nami nitakitwaa kilele kirefu cha mwerezi, na kukipandikiza mahali; na katika vitawi vyake vilivyo juu nitatwaa kitawi kimoja kilicho chororo, nami nitakipanda juu ya mlima mrefu ulioinuka sana; juu ya mlima wa mahali palipoinuka pa Israeli nitakipanda ... nao utakuwa mwerezi mzuri; na chini yake watakaa ndege wa kila namna ya mbawa; katika uvuli wa matawi yake watakaa.”

Kristo alikuwa Tawi hili, tawi la juu sana la kilele kirefu cha mwerezi. Alikuwa ni mmea uliokusudiwa na Bwana (*The Signs of the Times*, Julai 12, 1899).